

SIGRÚN KRISTÍN MAGNÚSDÓTTIR

## RITSTJÓRNARPISTILL



Sigrún Kristín Magnúsdóttir

Ágæti lesandi.

Hér getur að líta sjötta tölublað af Gátt, ársriti um fullorðinsfræðslu og starfsmenntun, sem Fræðslumiðstöð atvinnulífsins (FA) gefur út. Meginhlutverk Fræðslumiðstöðvarinnar er að vera samstarfsvettvangur stofnaðilanna, Alþýðusambands Íslands og Samtaka atvinnulífsins, í víðtæku samstarfi um símenntun á íslenskum vinnumarkaði. Samstarfið nær til þróunar nýrra aðferða til að efla þekkingu og færni fólks á

vinnumarkaði sem og framkvæmdar samstarfsverkefna. Gátt er ætlað að vera vettvangur fyrir umræðu um verkefni, viðhorf og kenningar sem efst eru á baugi hverju sinni. Sem fyrr er markmið ritsins að efla umræðu um fullorðinsfræðslu og starfsmenntun á Íslandi, miðla reynslu og kynna það sem ber hæst í umræðunni hverju sinni. Markmið FA er að í Gátt birtist úrval greina um hvaðeina sem varðar nám og fræðslu fullorðinna. Ritið er ætlað breiðum hópi í samfélaginu: þeim sem stjórna og vinna að fræðslumálum, leiðbeinendum, kennurum og námsmönnum og síðast en ekki síst öllum öðrum sem hafa áhuga á að kynna sér nýjungar og helstu sjónarmið í fræðslu fullorðinna. Ritstjórnin telur sig afar lánsama að hafa fengið til liðs við sig breiðan hóp fólks við skriftirnar. Í hópi greinahöfunda í þetta sinn eru sérfræðingar af ýmsu tagi, fræðsluaðilar, leiðbeinendur, náms- og starfsráðgjafar auk starfsmanna FA.

Breytingar, sem riðið hafa yfir íslenskt efnahagslíf og vinnumarkað, hafa óhjákvæmilega haft áhrif á starfsemi Fræðslumiðstöðvarinnar. Meginefni ritsins að þessu sinni er erfið staða á vinnumarkaði og hvaða úrræða er hægt að grípa til sem eru líkleg til árangurs. Hvað einkennir íslenskan vinnumarkað? Hvernig geta fræðsluaðilar mætt þörfum atvinnuleitenda fyrir færniþróun? Hvernig hefur staðan á vinnumarkaði þróast? Hvernig vegnar eldri borgurum í lífi og starfi? Í ritinu eru einnig almennar greinar um fullorðinsfræðslu, kennslufræðilegar hugleiðingar út frá athyglisverðri bók og umfjöllun um viðmið um íslenskt skólakerfi, spá um

vinnafls- og færniþörf í Evrópu fram til 2020 svo að fátt eitt sé nefnt.

Þótt menntunarstig vinnuaflsins á Íslandi sé ekki hátt, þar sem rúmlega þriðjungur þess hefur ekki lokið öðru námi en grunnskóla, þá búa margir að langri og fjölbreyttri reynslu á vinnumarkaði. Eitt af skilgreindum verkefnum FA er mat á raunfærni. Mat á raunfærni byggist á þeirri hugmynd að nám fari ekki eingöngu fram innan formlega skólakerfisins heldur við alls konar aðstæður og að allt nám sé verðmætt og það sé hægt að skjalfesta hæfni og þekkingu óháð því hvar hennar hefur verið aflað. Tilgangur raunfærnimats er að draga fram og meta fjölbreytilega færni sem einstaklingurinn býr yfir og í ritinu er nánar fjallað um nokkur verkefni af því tagi og sólskinssögur nokkurra einstaklinga sem hafa gengið í gegnum mat á raunfærni og stytt sér leið að sveinsprófi.

Í ritinu eru einnig fastir liðir: Þátturinn Hvað áttu við? Í honum eru settar fram tillögur um skilgreiningar og þýðingar á iðorðum sem varða nám fullorðinna og starfsmenntun. Þá er greint frá starfsemi FA og verkefnum sem unnið hefur verið að á árinu 2009. Öll miða þau að því að auka færni fólks á vinnumarkaði og efla fullorðinsfræðslu og starfsmenntun á Íslandi. Ritstjórnin vonar að ritið verði kærkomin lesning þeim sem koma að námi fullorðinna og hún hvetur lesendur til að láta skoðanir sínar í ljós, koma með ábendingar og hugmyndir og taka þannig virkan þátt í því að efla fullorðinsfræðslu og starfsmenntun á Íslandi.

*F.h. ritstjórnar*

*Sigrún Kristín Magnúsdóttir*